

COLOSENSES **Pabloa Colosas huakka' jak** **huaknopoe'eritaj** **o'manigmadoya'uyate.**

*Pabloa Colosas huaknopoe'eritaj
o'manigmadoya'uyate.*

¹ Do Pablo ijje_y. Jesucristoen huadak hua'a kamanbatia'pakike'po Diosa me'ta'mona'uyne. Huama'buy Timoteoere o'epo

² Cristoen huaknopoe'eri huama'buy mo'ene. Diosensi'po mo'ene. Huakka' jak Colosasyo mo'ika'ne. Do Pabloa on'nigmadoya'ne. Opu domeytaj Apag Diosa kamatinepahuie'po di' kamae' kamanopo'noeye'.

Pabloa huaknopoe'eritaj o'mationa'pakika'uyate.

³⁻⁵ Jesucristotaj daka' moknopoika'po mo'nigpeika'po aya' nog Jesustaj huaknopoe'eriomeytaj di' mo'maika'ne. Kenpa'ti kurudyo Diosere durugnanada o'unhuahuika'apoy mo'nopoepo mo'nigika'. Kenda on'tipeedepo o'tiona'pakpo Apag Diostaj Jesucristoen Apagtaj dakiti ona'ikay. Jesucristoen huadak hua'a, buttida hua'a Diosere durugda huanoeanhuahuika' hua'a mo'peedepo Diosere durugnanada o'unhuahuika'apoy mo'nopoika'ne.

⁶ Nogbayo nogbayo huabada meyopi' aratbut o'nika'nig Jesucristoen huadak hua'a on'manbatia'paknok huakka'amon huaboda

o'noknopo_{epo} on'nopo'korea'po Diostaj on'nigpeika'. Kenpa'ti buttida hua'a Dios di'nanada mo'epo mo'tinepahui'po konigti opudomeya mo'pe_{edepo} buttida hua'a o'e mo'nopo_{epo} mo'nigpeika'uyne.

⁷ Jesucristoen huadak hua'a Epafrasa opudomey Colosenses aratbuttaj monmadika'uyne. Ke'na oro'ere Cristoen huadak hua'a o'manmadikanhuamey. Oro' o'pakuynok opudomeytaj daka' monmadikika'uy.

⁸ Opudomeytaj Diosen Nokirega mo'nopo'toika'nok di' mo'maika'ne. Kenda Epafrasa oro'taj monbatia'pakme'ne.

⁹⁻¹⁰ Jesús Huairitaj moknopo_{epo} kenpa'ti nog huaknopo_{eritaj} di' mo'maika'. Kenme'noete kenda on'tipe_{edepo} huaboa'da opudomeytaj on'nigtiona'pakika'po, konig Dios Huairien Huasi'po 'urua'da o'kika'uyate opudomey konigti yag'kikati' kenpa'ti konig Diosa o'paknig nogiti nogiti yag'kikati', kenpa'ti nog aratbut pai'dapi' ene'nayo yan'bayokikati', yan'tihuapokikati' kenpa'ti nogiti nogiti Diostaj yanoknopo_e'. Kenda Diosa o'paknig opudomeytaj Diosa kamanopo_e'. Kenda on'nigtiona'pakika'ne. Kenpa'ti huadak dakhueapi' e'ka' kan'nopo_e' kenpa'ti 'urua'da kan'nopoenke' Diosen Nokirega opudtaj kabatihupokike'. Kenpa' on'nigtiona'pakika'ne.

¹¹ Dios 'urua'da o'epo konig huakjey o'epo teynanada o'epo opudennopo'taj mo'manopo'teypakike' teynanada mo'maika'. Kenpa' opudomeytaj on'tiona'pakika'ne. Ken e'manopo'teypakde'te aratbut opudomeytaj dakhuea' egka'te pai'da e'nopo'eada batikhue'ada

moknopopo huadiayhue'ada durugda
mo'ika'apone. On'tiona'pakika'ne.

12 Kenpa'ti Apag Diostaj dakiti ka'nona'ike'
on'tiona'pakika'ne. Oro'omey huakjeyyo Diosere
nog huaknopoe'eriye a'noeahuahuikaya'po
oro'en dakhuea' e'ka' Apag Diosa
bokkahuea'uyne kenpa'ti oro'taj dakhuea' e'ka'
mo'manopo'yarea'uyne. Konigepo, dakiti Dios,
ona'ika'dik o'ene.

13 Oro'omey Diostaj nigpeehue' o'ika'uyne.
Konig huanaba' o'epo toto' huairitaj
o'nigpeika'uyne. Konig sikkiregyo o'noika'po,
oroada dakhuea' e'kika' batikahue'dik o'ika'uyne.
Apag Diosa bo'tihuapokuynok dakhuea'
e'ka' o'mabatikuynye. Diosa huasi'potaj
di'nanada o'ika'po oro'omeytakon ke'nensi'po
bo'yahuea'dene.

14 Jesús Diosen Huasi'poa mo'nigbuey'uyyo
oro'omeytaj e'manopo'koreade'te
oro'omeyen dakhuea' e'ka' bokkahuea'po
mo'nopo'yarea'uyne.

*Opuomey Diostaj nigpeehue' o'ika'po
dakhuea'da o'kika'po konig Diosen taka'
o'ika'uyne. Cristoa mo'nigbuey'uyyo Diostaj
mo'manopo'noeyayuyne.*

15 Apag Diostaj tiahuyhue'dik o'ene. Diosen
Huasi'po Jesucristo Diosonigti' o'epo o'tiakuyyo
Dios konig o'enig oro'taj mo'manopoea'uyne.
Diosen Huasi'po Cristo Diosere huakkuruda
o'noika'uyate. Aya'da o'tiahuayika'nig konig
huadari, huadariyo huae'eri, siokpo, niokpo,

puug, aratbut, aya'da huæ'eri kahued Cristo o'noika'uyate. Cristo huakkuruda o'ika'uyate.

16 Dios o'paknok Diosen Huasi'poa aya'da o'ka'uyate. Katepi' o'ika'nig kurudyo aya'da o'ka'uyate. Katepi' huadariyo aya'da o'ka'uyate. Katepi' tiahuydik o'ika'nig aya'da o'ka'uyate. Kenpa'ti aya'da katepi' tiahuyhue'dik o'ika'nig o'ka'uyate. Diosen Huasi'poa kurudyo nokireg huairi huæ'diktaj o'ka'uyate. Diosen huata'moneri huairi huæ'diktakon o'ka'uyate. Huata'da o'nigka'uyate.

17 Indari, kurudyo huæ'erikon katepi' ehued ee'ted Cristonayo o'noe'ika'uyate. Aya'da katepi' kahued ee'ted kennayo o'noe'ika'uyate. Ke'na teynananada o'epo aya'da o'matoika'nok aya'da o'maunhuahuika'apo.

18 Aya' huaknopoe'erien huairi Cristo o'e. Huaknopoe'eria Cristotaj on'nigpeika', Cristoa aya'tada o'manoea'ika'. Cristo huakkuruda kubarkya' o'noyhuaduyate. Huakkurueri o'epo aya'enda huairi o'e.

19 Konig Dios o'enig Diosa o'pakpo konigti Cristo o'e. Cristo konig Dios o'e.

20 Diosa aya'tada kamanoeye'po cruzte Cristo o'buey'uy. Huadariyo huæ'eritaj kenpa'ti kurudyo huæ'eritaj aya'tada Diosa e'manoeya'ta' o'pakpo, Cristo cruzte o'buey'uy.

21 Opu domey a'nenda nog aratbutda Diosen ehue' mo'ika'uyne. Konig Diosen taka' mo'epo Diostaj nigpeikahue' mo'epo dakhuea' bo'kika'uynig'a oynayo Diosa opudtaj mo'manopo'noeya'dene. Oy Diosen huadi' mo'ika'ne.

22 Cristo huaso'ada pai'da o'nopo'epo mo'nigbueypo Diostaj mo'manopo'noeya'uyne. Daknopo'da kenpa'da Diosenyo'da mo'ika'po kentayo'da mo'nigpeika'ne. Konig dakhuea' da ahue' mo'enig, "Dakhuea' ogka'." Huaahue'dik mo'eapet. Ken konig opudomeytaj Diostaj kabayoke'po Cristo pai'da mo'nignopo'epo mo'nigbuey'uyne.

23 Konigepo daka' Jesucristotaj yanoknopoeon-huahuika'. Oknopoebatikhue'ada yanoknopoeonhuahuika'. Oro'en dakhuea' e'ka'taj Cristo mo'nigbuey'uyne. Oro'taj a'manopo'yareaya'po mo'nigbuey'uyne kenpa'ti kenere mo'noeonhuahuika'apo. Kenda mo'peedeika'nig, moknopoeon-huahuika'po batikhue' yane', "Oro'en dakhuea' e'ka'taj Cristo mo'nigbuey'uyne. Oro'taj a'manopo'yareaya'po mo'nigbuey'uyne kenpa'ti kenere mo'noeonhuahuika'apo." Aya' huadariyo huae'eri aratbuttaj on'manbatia'pakuyate. Doa Pabloakon konigti ijmanbatia'pakikay.

*Cristoen huaknopoe'eritaj yamanmadikikati'.
Diosa Pablotaj ona'uyate.*

24 Oy durugda ijje'po opudomeytehuapa' pai'da on'nignopo'ene. Aya' Cristoen huaknopoe'eritaj Cristo pai'da o'manignopo'e'uy. Opud huaknopoe'eritehuapa' Jesucristoen aya' a'dakeaya'po do'huakon huaso'da pai'da on'nignopo'unhuahuika'ne. Aya' huaknopoe'eriomey Cristoen huaso' konigti o'ne.

25 Opudtehuapa' nog huaknopoe'eritere aya'da Diosen hua'a kamanmadikadhuahue'po Diosa

me'ta'mona'uyne.

²⁶⁻²⁷ Opud judío ehue' huæ'eritaj 'urunanada o'magkika'po Cristoen Nokirega mo'nopo'toika'. Diosere durugnanada mo'noeonhuahuika'apo Diosa mo'nopo_{ea}'dene. A'nennada kenda ijka'apoy Dios e'nopoika'ada judío aratbuttaj manopo_{eahue}' o'ika'uyate. Judío ehue' huæ'eritaj 'urunanada ijmagka'apoy manopo_{eahue}' o'ika'uyate. Oynayo ke'nen huaknopo_e'eritaj o'manopo_{ea}'de.

²⁸ Aya' huaknopo_e'eri Cristotaj daka' kanoknopoike' kenpa'ti Cristotaj daka' kan'nigpeike', konig huaknopo_e'eri nogiti nogiti kanoknopoike'po Cristoen huadak hua'a o'manmadikikay. "Diostaj yan'pee'." "Diostaj yan'nigpee'." "Diostaj yan'nopo'korea'." Aya'tada o'maboroayikay. Daka' kan'nopoenke'po aya'tada daka' o'manmadikikay.

²⁹ Kenda digā'da ijikikay. Teyda ijikikay. Kenda kakike'po Diosa be'teypakika'ne.

2

¹ Opudomeya Laodiceaomeya nogomeyakon do'taj tiahuahued o'nene. Opudomeytaj kenomey huaknopo_e'eritere huakka'da ijmepe'ke'ika'po on'nigtiona'pakika'ne.

² Opudomey nogiti nogiti Diostaj yan'pakika'apet kenpa'ti huayahuaaya di'da yan'maika'apet, Cristotaj huakka'da yanoknopoika'apet. Cristotaj moknopo_{epo} Diostaj daka'da yanoknopoenka'apet. Kenpa'ti Cristotaj huaknopo_e' Diosa

o'ireganhuahuika'uynig kendakon
kanoknope'po, do'hua diga' on'tiona'pakika'ne.

³ Cristo Diosen aya'da o'nopoika'. Cristotaj daka'
eknope'nayo 'urua'da e'ka' mo'nopoika'apone
kenpa'ti huakka'nada mo'nopoenkika'apone.
Cristo Diostere moknopoenka'apone.

⁴ Nog arathbuta 'urua'da e'manmadika'te en-
gaña ogkahue'dik ya'neapet. Kenda opudomeytaj
o'nona'ne.

⁵ Opudenbayo opudere ehue' e'eada
opudomeytaj huakka'da ijpaki. Opudomey
Cristotaj daka' moknopoika'nok kenpa'ti
oknopoebatikhue' mo'ika'nok do'a durugda
ijikay.

⁶ Huairi Jesucristotaj konig huaboa'da
moknopoede'uynig kenpa'ti huaboa'da
durugda mo'nopo'korea'de'uynig konigti daka'
yanoknopoika'po yan'nigpeika'.

⁷ Konig hueymey hua'ihuit sorokyo
o'epo o'kerepo o'meybia'po, teyda o'epo.
Konigti kenpa'da Cristoen yan'pakika'po
daka' yanoknopoika'po, nogiti nogiti
yanoknopoika'. Cristotaj a'nenda mon-
madika'onhuahuika'uynigtaj nogiti nogiti
yanoknopoika'po Diostaj dakiti ya'nonikati'.

*Cristotaj oknopoenok Cristotere Diosa
mo'noeanhuahuika'ne.*

⁸ Keyoj o'nona'ne. Opudomeyere nama'da hua-
manmadika'eri o'nepo engaña egkata' on'pakpo
konig arathbutada nama'da on'nopoika'nig
opudomeytaj enmadikata' bo'tipakne. Daka'
Cristotayo'da yanoknopoepo kenomeytanayo
manigpeehue' yanikati'. Konig adhuea'pane'

ogkika'uyatenig kenpa'ti on'nopoikuyatenig nama'da monmadikapetnig manigpeehue' yanikati'. Kenda Cristo o'manmadika'uyatenig ken konig onmadikahue' mo'eapet.

⁹ Aya'tehuapa'da Dios o'e konigti Cristodation o'e.

¹⁰ Opu domey Cristotaj moknopopepo Diosen Nokirega mo'nopo'teopo, opudomeytaj mo'noea'ika'ne. Cristo aya' huairien huairi o'e. Cristoa aya'tada kuruderi huairitaj mata'mona'dik o'maika'. Aya'ada Cristotaj nigpeika'dik o'nika'.

¹¹ Judío huabokerektaj on'si'dakoktegika'po. Opu domeynayo Cristotayo'da moknopopepo Diosensi'po hueretda mo'ene. Konig bo'eretpakika'po dakhuea' e'kikameada onte'ti kikhue' mo'ene.

¹² Kenpa'ti Jesucristo e'bueyde'te egkubarakka'uytada Diosa teyda o'epo o'noyhuada'uyate. Opu domey kenda moknopopepo bautiza mogka'po konigti Cristoere e'kubarakka'nig Cristoere Diosa mo'nopo'noea'uyne.

¹³ A'nen Diostaj okiehued mo'epo dakhuea'da bo'kika'po Diostaj nigpeehue' mo'ika'uy. Huabokereksi'dak okteghue' huae'eri mo'epo Diosensi'po ehue' mo'uyne. Diostaj oknopoehue'da mo'uyne. Oynayo aya' dakhuea' bo'ka'uyatenigtaj Diosa bokkahuea'depo Cristoere mo'noeanhuahuika'ne.

¹⁴ Diosen hua'a Moisésa o'manigmadoya'uyate. Opu domey kenda nigpeehue'ada dakhuea' bo'kika'uyne. Moisésenba'taj nigpeehue'

huae'eritaj castiga magka'dik o'e. Oro'omeya dakhuea' o'kika'nok Cristotaj hueypa cruze mo'nigbeta'uyne siropia mo'nigbeta'uynok mo'bakkahuea'uyne.

15 Aratbuta en'tiahuaya'te Cristo cruze o'bueydepo toto' huairitaj okbiraepo o'teyhue'paka'uyatenok. Konigepo oro'omey huaknopoe'eri dakhuea'ogka'toto' huairia onte'ti huaahue'dik mo'eapone.

Kenda Cristo kurudyo o'pakika'nigtaj yan'pakpo yag'kika'.

16 Oynayo Cristotaj moknopoe'po "Ken aypo mo'bape'po pehue'dik mo'ene." Be'api' ena'nayo manigpeehue' yanikati'. "Ken huamai' mayhue'dik mo'ne." Be'api' ena'nayo manigpeehue' yanikati'. Huabayok judioen Diostaj e'durugpak fiestate huahue' ee'nayo, huabo puug judioen Diostaj e'durugpak fiestate huahue' ee'nayo judioen Diostaj e'durugpak okmapie'ahuaddik fiestate huahue' ee'nayo "Hua'dik mo'ne." Be'api' e'na'nayo manigpeehue' yanikati'.

17 Kenda fiestate aypote huamai'takon judioa on'mana'ika'po ogkika'uynig'a Cristo cruze e'bueyde'te onte'ti kikhue'dik mo'ene. Cristoen hueretda hua'a o'enok Cristotayo'da yan'nigpei'kati'.

18 Hua'ikudate yan'huadpo Diosen huata'moneritaj tiona'pakdik yanikati'. Sue'ada nama'da huamanmadika'eria on'mana'nig'a tiahuayhuedada nama'da on'nopoe'po on'mana'nig'a. "Kenda o'nona'nig nigpeehue'

ee'nayo nama'da boka'. Diosensi'po ehue' mo'ene." Kenomeya ena'nayo peehue'dik yanikati'. Konig aratbut Diostaj oknopoehue' huae'eri o'nepo nama'da on'nopoika'po. Huadakda ijje, huadaknada ijkikay nama'da on'nopoika'po.

¹⁹ Cristotaj daka' oknopoehue' o'nika'. Cristo konig huaknopoe'erien huanopo' o'e. Huaknopoe'eri konig Cristoen huaso' o'ne. Huaknopoe'erinayo Cristotayo'da on'nigpeika'. Nama'da huaa'eri Cristotaj nigpeehue' o'nika'. Oro'mey huaknopoe'eri konig Cristoen huaso' o'ene. Konig nogso'tida o'epo nogiti nogiti moknopoea'ne Cristoa. Nogiti nogiti o'nigpeika'ne. Kenpa'ti konig nogso'tida konigti Cristotaj moknopoea'ne Diosa.

²⁰ Cristoa oro'meytaj mo'nigbuey'uyatenok opudomey a'nopo'yareaya'po moknopoe'epo konig Cristoere mo'bueydepo konig oknopoehue' huae'eria nama'da on'nopoika'nig onte'ti nopoehue' yanikati'. Konig oknopoehue' huae'eria nama'da on'nopo'epo on'mana'ika'nig manigpeehue' yanika'. A'nopo'yareaya'po kenda peehue'dik yane'. Konig oknopoehue' huae'eriomey nogen e'manmadika' ogkika' kenda kahue' yanika'.

²¹ "In nejhue' yanikati'." "Ken aypo pehue' yanikati'." "Kentaj huaba'api toeahue' yanika'." Ken konig on'mana'ika'nig manigpeehue'dik yanikati'.

²² Nejhue'dik, pehue'dik, bapadhue'dik huabokerekayo'da on'mana'ika'nig kenda on'mana'ika'nig ehue' o'eapo.

23 Kenda on'manika'nig 'urua'da e'nopo'e'onig aratbuta nama'da on'nopo'epo. Aratbuta on'manigpeika'po nama'da hua'ikudate onhuadpo Diosen huata'moneritaj on'tiona'pakika'po, Diostaj on'tiona'pakika'po, sue'da ijje'y huairihue' ijje'y nama'da on'nopoika'po, kenpa'ti nama'da Diosta' pai'da on'nopo'epo. Kenda ogkika'po huadakda o'ey aratbuta nama'da on'nopo'epo kenpa'da dakhuea' e'ka'ta' on'eretpakika'. Kenda huabokereka nama'da on'mana'ika'nig kenpa'ti nama'da on'kika'nig'a dakhuea' bo'kika'nigtaj batikhue'dik o'nika'.

3

1 Ken, Cristo e'bueytada kubarakya' Diosa o'noyhuada'po onte'ti o'noea'uyate. Cristoere Diosa opudomeytaj mo'noea'uyne. Konig Diosen 'urunanada huaknopo'e'eri mo'noea'uyne. Konigepo kenda Cristo kurudya' o'pakika'nig mon'pakpo mogkika'. Cristo kurudyo Diosere teynanada 'urunanada o'ika'nok ke'nenyo'da moderetpakika'.

2 Kurudyo Dios o'noika'po Cristoere o'noika'. Kenda Cristo o'paknig konigti mon'pakika'. Konig Cristo o'epo o'kika'nig mon'nopoika'. Katepi' indariyo o'ika'nig kenpa'ti katepi' aratbuta ogkika'nig nopoikahue' mo'nika'.

3 Cristo oro'omeytaj mo'nigbuey'uyate oro'omeya o'nopo'edepo konig aratbut kubarakya' katetapi' onte'ti dakhuea' kahue' o'nenig, oro'omeyakon onte'ti dakhuea' kahue' mo'nika'. Oy huaboa'da oknopo'epo Cristoere Diosyo

o'noika'ne. Diosa daka' mo'nopo'toenok Cristoere o'noehuahauika'apone.

⁴ Ken Cristo oro'en huamanoehuahauika'eri o'e. Ke'na onte'ti kurudya' e'tiakte kenoka' oro'omey huaknopoe'eri Cristoere 'urunanada o'ehuahauika'apone.

A'nenda Cristotaj oknopohued mo'epo dakhuea'da bo'kikame'nig'a. Oynayo Cristotaj moknopodepo huadakda yag'kika'. Diosenyo'da yag'kika'.

⁵ Katepi' dakhuea'da e'ka'ta' e'paknayo Jesucristotaj yoknopoe'epo Cristoere do'huedso' o'bueyde, do'hued e'nopoe' o'bueyde, onte'ti dakhuea' kahuea'dik ijje'y, yan'nopoi'kati'. Ken konig mo'nopoe'epo, nogen huatoe'taj bakdejhue' yanika'. Huabokerek nogtaj nogtaj ettone'taj bakdejhue' yanika'. Ettone' nogtaj nogtaj huabokere'kta' bakdejhue' yanika'ti'. Katepi' dakhuea'da konig oro'enso' o'pakika', onte'ti pakhue' yanika' kenpa'ti kahue' yanika'. Kenpa'ti katetapi' e'tamaeta' eretpakhue' yanika'ti'. Katetapi' e'eretpaknayo konig e'ketka' diostaj e'pak o'e. Dakhue'da o'e.

⁶ Aratbut ken konig dakhuea'da ogkika'po Diostaj nigpeehue' o'nika'nok Diosa diga'nada castiga o'magka'apo.

⁷ Kenda dakhuea'da ogkika'nig opudomeya bo'kika'uynig'a konig Cristotaj oknopohued mo'epo bo'kika'uynig'a.

⁸ Oy Cristoere mo'noedepo aya' in konig onte'ti kahue' yanika': Nogomeytaj bahuadiayhue' yanika'. Maboyhue' yanika'. Mahui'jahue'

yanika'. Batidi'kehue' yanika'. Dakhuea'da bahuaa'pakhue' yanika'.

⁹ Huayahuaya da bahuaahue' yanika'. A'nenda Cristotaj oknopoeuhed mo'epo nama'da mo'nopoika'po dakhuea'da bo'kika'uyate. Oynayo Cristotaj moknopoe depo onte'ti konigti dakhuea' kikhue' mo'ika'ne.

¹⁰ Oy konig huabonopo' mo'edepo konig Diosa o'nopoika'nig huaboa'da mo'nopoika'po. Konig Diosa o'paknig nogiti nogiti bo'pakpo mo'nopoika'ne. Diosa aratbuttaj huamatime'a'eri o'enok nogiti nogiti daka' moknopoeapone.

¹¹ Ken konig Cristoere o'noepo huaboa'da o'nopoepo ken konig huaboa'da o'kikay, "Judío ehue' ijjejey." Ahue' o'ene. "Judío ijjejey." Ahue' o'ene. "Do'huedsi'dak okteg'uy." Ahue' o'ene. "Do'huedsi'dak okteghue' o'uy." Ahue' o'ene. "Nog aratbut ijjejey." Ahue' o'ene. "Esoeri ijjejey." Ahue' o'ene. "Huanaba' ijjejey." Ahue' o'ene. "Huanaba' ehue' ijjejey." Ahue' o'ene. "Kenyo'da Cristoen ijjejey. Kenyo'da Cristotaj ijpaki. Kenyo'da Cristotaj e'nigpeika'ta' ijpaki." Kenda aya'ada a'dik o'ene.

¹² Diosa opudomeytaj di' mo'epo mo'baktie'ea'uy nok Diosenyo'da mo'ene. Konigepo aya'tada yan'matinepahuika'po. Daknopo'da huadaka'da yan'manigkika'. Donayo huairi ehue' ijjejey, yan'nopoika'. Nogomeytaj daka' yan'manigpeika'. Nogomeya dakhuea' egka'nayo bahuadiayahue' yanika'.

¹³ Nogomeytaj dig mahuanopoeuhue' yanika'. Noga dakhuea' egka'nayo kentaj yan'bakkahuea'po huadiayahue' yanika'. Konig Cristo Huairi oro'taj bokkahuea'uy nig konigti

nogomeytaj yan'bakka^huea'ika'.

¹⁴ Huakka' di' yan'maika'. Huayahuaya di' yan'maika'. Kenda Diosa huakka' o'pak. Di'nada e'maika'nayo konig onpapayo' mo'ika'po konigti Diostaj bo'pakika'po aya'da 'urunanada bo'kika'apone.

¹⁵ Opudomeyennopo'taj Diosa kamanopo'noeye'. Kenda Diosa o'pak. Aya'ada konigti yan'nopoika'. Konigti yan'pakika'. Konigti yag'kikati'. Ken konig nogso'tida ka'ne'po Diosa mo'baktie'ea'uyne. Kenpa'ti Diostaj dakiti ya'nonika'.

¹⁶ Aya'da Cristo o'manmadika'uyatenigtaj yan'nopoika'po, huanopoya'da yan'diktoikati'. Kenda nogtaj nogtaj yan'manmadikika'. Kenpa'ti Cristoen e'manmadika'taj yan'nigpeika'. Nogomeyere huayahuaya yan'manikati'. Diosen e'manmadika' 'urua'da yan'nopoepo huayahuaya yan'mandikika'. Diostaj dakiti mona'po daknopo'da Diostaj yan'batadi'kea'ika'. Huanopoya'da dakiti ya'nona'po yan'batadi'kea'ikati'. Dios Jesucristo-ere 'urua'da mo'toika'ne yan'batadi'kika'.

¹⁷ Katepi' bo'kika'nig katia'pi' boa' kenda Huairi Jesús o'pakika'nig yadika'po yag'kika'. Jesústaj moknopoepo Diostaj dakitia' yan'tiona'pakikati'.

Konig Cristoen huaknopo^eeria huayahuaya Cristotaj 'urua'da nigka'dik o'ne.

¹⁸ Ettone'a Jesús Huairitaj eknopo^enayo Huairi Jesús^e mo'epo, Jesús o'pakika'nigda opuden huato^e'taj yan'nigpeika'.

19 Huabokereka opuden huatoe'taj di'da yanika'. Huatoe'taj huadiayhue' yanika'. Kenpa'ti huiyoka'da onahue' yanika'.

20 Apag Diosa o'paknok huasi'poa opudomeyen huaojtaj huayetere yan'manigpeika'. Huaojtaj huayetere e'nigpeika'nayo Diosa durugda o'ika'apo.

21 Huaoa huasi'potaj diga'da barakhue' yanika'. Huasi'potaj diga'da e'bitbitnayo huasi'po pai'da ya'neapetpi'. Onte'ti daka' nigpeehue' ya'neapetpi'.

22 Opuomey huanaba' mo'epo opuden huairitaj yan'nigpeika'. Huairia e'tiahuayteyo'da daka' nigpeehue' yane'. Huairia e'tiahuayte kenpa'ti huairia tiahuayhue' ee'tepi' daka' yan'nigpeika'. 'Urunopo'da Diostaj daka' yanoknopoepo daka' yan'nigpeika'.

23 Katepi' bo'kika'nig daka' yag'kika'. Jesústehuapa' ijkay yan'nopoepo 'urua'nanada yag'kika'. Huabokerektayo'da ijmanigkay nopoehue' yanika'.

24 Cristo opuden Huairi o'enok kentayo'da yan'nigpeika'. Diosen Huasi'poere mo'noeonhuahuika'apo. Kenda mo'nopoene.

25 Be'api' dakhuea' egka'nayo pai'da on'nopo'epo. Be'api' huairi huanaba'pi' dakhuea' egka'nayo Diosa castiga diga'da ya'magka'apet.

4

1 Huairia huanaba'taj mo'matoika'po daka' yan'matoika'. Dakhuapa yan'bayokika'. Huairi mo'taika'nok okkahuehue' yanika'.

² Kirigayo' yan'tiona'pakika'. Tayhue'ada daka' yan'tiona'pakika'. Dakiti Dios, yan'tiona'pakika'.

³ Kenpa'ti oro'taj motiona'pakika'. Cristoen huadak hua'a a'nenda Diosa soatayo' e'nopoeada manopoeahue' o'uyate. Oy Cristoen huadak hua'a oro'a e'manbatia'pakta' o'paki. Oroa kan'manbatia'pake'po Jesús Huairia oro'taj bo'tihuapokike'po yan'tiona'pakika'. Cristoen huadak hua'a ijmanbatia'pakikame'nok huabakuda' jakyo megkudame'ne. Huabakuda' jakyo ijje.

⁴ Pabloa Cristoen huadak hua'a arat-buttaj 'urua'da kamanopoea'ike'po do'taj men'tiona'pakikati'.

⁵ Daka' yan'nopoika'po yag'kika'. Ken oknopoehue' huae'eri opudomeyere o'nika'po opudomeytaj bo'tiahuayika'nok daka' yan'nopoepo yag'kikati'. Nogomeytaj kirigayo' yan'mantihuapokika'.

⁶ 'Urua'da yan'batia'pakika'. Nogomeytaj a'batihuapokya'po huadakda yan'batia'pakika'. Daka' yan'nopoepo dakteynopoda nogomeytaj daka' yan'manbatia'pakatokika'.

Saludos on'manigdikta'mona'uyate.

⁷ Tíquico oro'omeyen huadi'da huama'buy o'e. Do'taj daka' be'tihuapokika'uyne. Doere Jesús Huairitaj o'nigpeika'uy. Do konig o'ea' montia'pakapone.

⁸ Konigepo Tíquicotaj opudomeytaj on'nigta'mona'ne. Konig o'ea' do'taj be'huae'po kenpa'ti nogiti nogiti Cristotaj kanoknopoe'po on'nigta'mona'ne.

9 Kenere Onésimoeretaj on'nigta'mona'ne. Onésimo oro'omeyen huama'buytion o'e. Di'da mo'taene. Diostayo'da o'nigpeika'. Opudomeyen aratbut o'e. Ke'na Tíquicoere monbatia'pakapone. Iyoda aya'da huaknopoe'eria ogkika'nig kenda opudomeytaj monbatia'pakapone.

10 Aristarco doere huabakuda' jakyo o'epo, opudomeytaj saludos mo'nigdikta'mona'ne. Marcosakon saludos mo'nigdikta'mona'ne. Marcos Bernabéen huama'buy o'e. Marcos huadaktion huaknopoe'eri o'enok kenpa'ti opudomeyte ehua'te daka'yadeti'.

11 Kenpa'ti Jesús Justoa saludos mo'nigdikta'mona'ne. Aristarco Marcosere Jesús Justoere judío huaknopoe'eri o'ne. Kenomeyyo'da judío huaknopoe'eri doerea on'manmadikika'po, "Yan'nopo'korea'po Jesucristo Huairitaj yan'noknopoe'epo yan'nigpeika'." Doerea on'mana'ika'nok do'taj on'durugpakanhuame'ne.

12 Epafra saludos mo'nigdikta'mona'ne. Konig Cristoen huanaba' Cristoenyo'da o'kika'po opudomeyen aratbut o'e. Opudomeytaj huakka'da mo'tiona'pakika'ne. Opudomey Diostaj daka' moknopoika'po batikhue'da yanoknopoika'. Aya'da Diosa o'pak daka'da moknopoika'po aya'da bo'kika'apo. Kenda Epafra mo'tiona'pakika'ne.

13 Epafra opudomeytaj mo'timepukepo diga'da mo'tiona'pakika'ne. Kenpa'ti Laodicea huaknopoe'eritaj kenpa'ti Hierápolis huaknopoe'eritaj o'matimepukepo o'manigtiona'pakika'. Kenda ijtiahuayika'po opudomeytaj o'nona'ne.

14 Lucas huamadakka'eri o'e. Di'da mo'ene. Opudomeytaj saludos mo'nigdikta'mona'ne. Demasakan saludos mo'nigdikta'mona'ne.

15 Laodicea huama'buytaj saludos ijmanigdikta'monay. Ninfastakon saludos ijmanigdikta'monay. Kenpa'ti Cristoen huaknopoe'eri Ninfasen jakyo ogkupopakika'nigtaj saludos ijmanigdikta'monay.

16 In beroba' ijnigmadoya'dey opuda yan'mona'pakdepo Laodicea huaknopoe'eritaj yan'bata'mona'. Nogda beroba' Laodicea huaknopoe'eritaj ijnigmadoya'po ijta'mona'mey e'mokyede'te yan'mona'pakti'.

17 "Huairi Jesús aya'da ona'uyate, Arquipo, 'uruda yanopoepo daka'yakadhuahuika'." Kenda Arquipotaj ya'nonati'.

18 In saludo huadik on'nigta'mona'ne do'hued huaba'a on'nigmadoya'ne. Huabakuda' jakyo ijjeonhuahuikay. Do'taj okkahuehue' menika'. Dios opudomeytaj daka' mo'tojke', ken.

**Jesucristo oy oa'pak: Kenda Jesucristoa;
monigka'uyatenok; Diostaj
mo'manopo'yarea'ika'ne**

New Testament in Amarakaeri (PE:amr:Amarakaeri)

copyright © 2008 Wycliffe Bible Translators, Inc.

Language: Amarakaeri

Translation by: Wycliffe Bible Translators, Inc.

Amarakaeri [amr], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Amarakaeri

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-02-11

PDF generated using Haiola and XeLaTeX on 18 Apr 2025 from source files dated 29 Jan 2022

86e43144-8403-5994-a826-4a127b2f67da